

# La revoluziun mobila tar RTR

## Rapport dal cussegl dal public SRG.R

■ (rtr) En l'ultima seduta dal 2016 è il cussegl dal public SRG.R (CP SRG.R) sa fatschentà tranter auter cun il schurnalissem mobil tar RTR. Cun il diever da smartphones ha quel survegnì ina dimensiun cumplettamain nova. Medemamain è vegnidas prendidas sut la marel-la las duas producziuns da live-stream dal Campiunadi grischun da ballape da las scolas medias a Schiers/Aschera e da la discussiun da podium dal Parc Adula a Mustér. Grazia als smartphones daventa il schurnalissem adina pli mobil. Il svilup tecnologic permetta la producziun, l'elavuraziun e la publicaziun da videos sin ils differents chanals da distribuziun dad RTR. Quellas contribuziuns èn era spezialmain adattadas per las medias socialas. Cun ils telefonins san schurnalistas e schurnalists reagir fitg svelto sin l'actualitad e metter a disposiziun ils cuntegns per in e scadin. RTR na plazzescha las contribuziuns natiralmain betg sulettamain sin facebook, mabain era sin sia pagina d'internet convenziunala. Il CP SRG.R beneventa che tant la qualitat publicistica sco era la moda e maniera co ch'ils videos vegnan producids vegnan controlladas permanentamain. Cun la definiziun da process e structures cleras vegn era garantì ch'il newsfeed na vegn betg inundà da contribuziuns dad RTR. En spezial emisions da radio profiteschan da talas publicaziuns supplementaras. Cun fotografias e videos survegnan visitaders da la pagina d'internet www.rtr.ch e dals ulteriurs chanals dad RTR anc dapli impressiuns ed infurmaziuns che pertutgan las emisions da radio. Las novitads sin la

pagina d'internet vegnan adina pli savens era cumpletadas cun graficas e visualisaziuns attractivas.

### Debatte Parc Adula

Il rapport dal Campiunadi grischun da ballape da las scolas medias dals 30 da settember 2016 a Schiers/Aschera è vegnids discutads a moda cuntraversa. D'ina vart ha la redacziun da giuventetgna «Battaporta» avischinà l'offerta dad RTR ad in public pli giuven e rapportà en moda e maniera excellenta. Da l'autra vart na s'adressescha l'occurrenza betg ad in public fitg vast, quai che ha manà ad ina discussiun davart ils custs ed il niz da talas producziuns. Igl è però era da resguardar che RTR e la SRG SSR s'occupan, independentamain da quotas d'auditurs ed aspectaturs, explicitamain era da tematicas da nischia e da minoritads. RTR ha rapportà a moda e maniera equilibrada dal project Parc Adula. Il 3 da november 2016 è la debatta en connex cun il project vegnida trasmessa en directa da Mustér via live-stream en las chasadas. *Andri Franziscus* ha persvadì sco moderatur e manader da la discussiun.

### Infurmaziun da las elecziuns en ils Stadis Unids da l'America

Il CP SRG.R ha er observà l'infurmaziun dad RTR en connex cun l'elecziun dal president dals Stadis Unids da l'America che ha gè lieu il 8 da november 2016. Durant la fasa avant las elecziuns ha RTR mess il focus sin l'intermediaziun objectiva da resultats. Avant il termin da l'elecziun en ils rapports e las infurmaziuns lura vegnids intensivads ed igl è era vegnì tratg a niz modas da rapportar innovativas

sco per exempel via skype. Il CP SRG.R ha era preni notizias cun satisfacziun dal vast e cumplexiv dossier online installà sin www.rtr.ch. Medemamain lauda il cussegl la reportascha multimediale «Las Americas – Vita rumantscha vi sur mar» che ha purtretà trais Rumantschas ed in Rumantsch che vivan en ils Stadis Unids da l'America.

### Premi schurnalistic SRG.R

Il cussegl dal public ha decidì da desister en l'avegnir da surdar il Premi schurnalistic SRG.R. Il reglament correspondent è vegnì aboli. Il Premi schurnalistic SRG.R onurava products schurnalistics da la chasa RTR ed è vegnì surdà il 2013 en fin 2015. Il premi era dotà cun 6000 francs. Il cussegl ha surdà il 2013: «Allegra Rumantschs» da *Livio Foffa* e *David Spinnler*

2014: «Dal Magic Wood a l'Action Wood» da *Petra Rothmund*

2015: «Med Ursina i København» dad *Astrid Alexandre*.

### Prevista

Il CP SRG.R è s'inscuntrà l'ultima giada en questa cumposiziun. La perioda d'uffizi actuala terminescha la fin da l'onn. *Augustin Beeli*, *Letizia Sonder* e *Romeo Wasescha* mettan a disposiziun lur uffizi sco commembers/-bras dal cussegl dal public SRG.R. Il president dal CP SRG.R, *Michael Spescha*, ed il commember *Vito Stupan* han remess lur uffizis pervia da la limitaziun dal temp d'uffizi. La proxima seduta dal CP SRG.R ha lieu il 25 da schaner 2017. A partir dal 1. da schaner 2017 vegn il CP SRG.R lura presidià da *Roger Tuor-Reuss* da Mustér.